

Segirezza tar ils gieus da hockey sin glatsch

Inscunter dal cusseglier guvernativ Christian Rathgeb cun la direcziun dal HCD

■ (cc) Dacurt è il cusseglier guvernativ Christian Rathgeb, schef dal departament da giustia, segirezza e sanadad, Walter Schlegel, cumandant da la Polizia chantunala dal Grischun, e Mathias Fässler, secretari dal departament, sa scuntrads cun la direcziun dal club da hockey da Tavau (HCD). Il tema principal da la discussiun che ha lieu annualmain è stada la segirezza tar ils gieus da hockey sin glatsch a Tavau. Las persunas responsablas da la politica, da la polizia e dal sport pon dar in bun attestat als fans.

L'inscunter cun il president dal HCD, Gaudenz F. Domenig, e cun il president d'onur dal HCD, Tarzisius Caviezel, ha mussà che la collavuraziun en il sector da la segirezza funcziuna bain. Perquai che las persunas responsablas cumbattan en moda consequenta cunter ils paucs problems existents poi vegnir desistè in il Grischun er vinavant da mesiras che chaschunan gronds custs. Da tuttas duas varts è tant l'inscunter annual sin il stgalim directiv sco er ils contacts regulars e las cunvegns en il sector operativ vegnids giuditgads sco prezios e cunvegents. La collavuraziun tranter il servetsch da segirezza dal HCD e la Polizia chantunala dal Grischun funcziuna perfetgamain ed è sa cumprovada. Sco problematicas vengnan giuditgads er vinavant circa 25 fans ch'èn prontos da duvrar violenza e ch'èn enconuschents a la polizia sco er in pèr paucs gieus da hockey che pretendan mintgamai in'acziun da polizia pli gronda. Tar tut ils auters gieus dal HCD è la Polizia chantunala dal Grischun en acziun cun paucs policists en ed enturn il stadion a Tavau. Grazia a la buna collavuraziun ed al sustegn vicendaivel pon ils problems vegnir percepidis e prendids per mauns a temp.



Il cusseglier guvernativ Christian Rathgeb (segund da sanester), il cumandant da polizia Walter Schlegel (sanester) ed il secretari dal departament Mathias Fässler (amez) s'inscuntran cun la direcziun dal HCD, representada da Gaudenz F. Domenig, president dal HCD (dretg), e da Tarzisius Caviezel, president d'onur dal HCD.

MAD

In laud per ils fans e per il club da fans

Ina giada dapli survegnan ils fans ed il club da fans dal HCD in bun attestat. Els s'engaschan en moda exemplarica e loiala per ch'il sport stettia en il center e per che la violenza n'haja nagina plazza en ils conturns da gieus da hockey sin glatsch en il Grischun. Qua tras mettan els in segn cler cunter ils paucs fans ch'èn prontos da duvrar violenza. Il proceder consequent da la Polizia chantunala dal Grischun cunter ils

rowdies è sa cumprovà. Ils meds che stattan a disposiziun, sco scumonds d'entrar en il stadion u en tsherts areals, vengnan applitgads en cas da bassegn, controllads ed exequids regularmain.

Adattaziuns tar las mesiras cunter la violenza tar occurrenzas da sport

Actualmain vegn adattà il concordat dals 15 da november 2007 davart las mesiras cunter la violenza a chaschun d'occurrenzas da sport. En quest con-

nex elavura la Polizia chantunala dal Grischun la missiva correspundenta per mauns dal departament e da la regenza grischuna per che la fatschenta possa vegnir tractada l'onni proxim en il cussegl grond. Da nov duai vegnir introducida in'obligaziun da dumandar ina permissiun per gieus da ballape e da hockey sin glatsch. Quai per pudair far differentas cundiziuns envers organisaturas ed organisaturs privats d'occurrenzas da sport. Tant las persunas responsablas dal chantun sco er la di-

recziun dal HCD èn da l'opiniun che questa obligaziun da dumandar ina permissiun saja da princip raschunai-vla. Ella na duaja dentant betg purtar cundiziuns supplementaras per gieus nunproblematics dal HCD. Areguard la periclitaziun tras fans ch'èn prontos da duvrar violenza na pon gieus da hockey sin glatsch betg vegnir cumparegliads cun gieus da ballape. Plinavant n'è la situaziun en il Grischun actualmain betg uschè problematica sco tar uniuns en auters chantuns.